

堯山堂外紀

洗心堂外紀卷十八

晉陵蔣仲舒編

六朝

前趙後趙前涼秦燕後涼北涼

陳安

成紀人少慷慨讀書見許褚慕之乃自字虎侯

晉懷愍間劉曜圍陳安于隴城安敗南走陝中曜使將軍平先率勁騎追之安與壯士十餘騎於陝中格戰安左手奮七尺大刀右手執丈八蛇矛近交則刀矛俱發輒害五六遠則雙帶鞬服

左右馳射而走平先亦壯健絕人與安搏戰三
交奪其蛇矛而退遂追斬于澗曲安善撫按及
其死隴上爲之歌曰隴上健兒曰陳安軀幹雖
小腹中寬愛養將士同心肝騾驄駿馬鐵鍛鞍
七尺大刀配齊鑲丈八蛇矛左右盤十盪十決
無當前百騎俱出如雲浮追者千萬騎悠悠戰
始三交失蛇矛十騎俱盪九騎留棄我騾驄攀
巖幽天非降雨追者休阿呵嗚呼奈子乎嗚呼

阿呵奈子何曜聞而嘉傷命樂府歌之

初漢高

妻冒頰故其子孫遂冒姓劉魏晉間呼延氏祈
子龍門有一白魚頂有一角至祭所又之乃去
其夜夢所見魚變為人把一物大如雞子授之
曰此是日精服之生貴子自是十五月生淵建
國號曰漢至曜改
稱趙是為前趙

汲桑

清河貝丘人有力能扛鼎晉大安中并州
危亂刺史東瀛公騰執諸胡賣充軍實

石勒亦在賣中既賣與在平人為奴奴家
鄰馬牧桑時為牧率勒以能相馬自託於
桑遂招集桃豹
遼明等為羣盜

晉東海王越字元超懷帝永嘉初出鎮許昌率充

州刺史苟晞及冀州刺史丁邵討汲桑破之時
有謠云洛中大鼠長尺二若不早去天狗至又
云元超兄弟大洛度上桑打榘爲苟作越聞而
惡之乃轉晞爲青州刺史自領兖州由是與晞
有隙

汲桑殘忍少恩六月盛暑重裘累裯使十餘人扇
之意不清涼便斬扇者後爲并州大姓田蘭所
殺士女慶賀奔走道路而歌曰士爲將軍何可

羞六月重裯披豹裘不識寒暑斷人頭雄兒田

蘭爲報讐中夜斬首謝并州

石勒初歸劉淵以爲輔漢將軍後滅

曜稱大趙天王是爲後趙勒每破一州必簡別衣冠號爲君子城

初嘉

字孔賓酒泉人

初嘉少清貧好學年二十餘夜窓中有聲呼云初
孔賓初孔賓隱去來隱去來修飾人世甚不可
諧所得未毛銖所喪如山崖及旦嘉逝去西至
燉煌依學官誦書遂博通經傳精究大義西遊

海渚教授門生張重華徵爲儒林祭酒在朝卿

士郡縣守令受業者二千餘人竟以壽終

張氏自執

及寔茂駿四世忠晉至重華自立爲王傳祚天錫是爲前涼

宋纖

字令父徽煌人

宋纖隱居酒泉南山不應辟命酒泉太守馬岌造

焉纖距而不見岌歎曰名可聞而身不可見德

可仰而形不可覩今而後知先生人中龍也銘

詩于石壁曰丹崖百丈青壁萬尋奇木鬱鬱蔚

若鄧林其人如玉維國之琛室邇人遐實勞我心張祚時大守楊宣畫纖像於閣上出入視之作頌曰爲枕何石爲漱何流身不可見名不可求

韓博

張天錫嗣位涼州時符堅彊盛天錫遣從事中郎韓博奉表江左尅日大舉博有口才大司馬桓溫甚稱之當大會溫使司馬刁彞朝之彞謂博

曰卿是韓盧後博答彞曰卿是韓盧後溫笑曰
刁以君姓韓故相問耳他自姓刁那得是韓盧
後邪博曰明公脫未之思短尾者爲刁也一坐
推歎

辛攀

字懷遠
隴西人

辛攀父璆嘗爲尚書郎兄鑒曠弟寶迅皆以才識
知名西涼爲之語曰五龍一門金友玉昆

蒲洪

字廣世其先有扈氏苗裔世爲氏酋其
家池中生蒲長五丈五節如竹形特威

異之謂之蒲家因以爲氏後以讖文有草
付應王又以孫堅背文曰草付之祥遂改
姓符洪見堅壯貌欲令
頭堅腹軟字之曰堅頭

蒲洪好施多權畧晉永嘉之亂宗人蒲光蒲突共
推洪爲盟主石虎以洪爲龍驤將軍先是隴右
大雨百姓苦之謠云雨若不止洪水必起故因
名洪

符堅洪季子雄之子也洪歿世子健嗣位健入關
時夢天神遣使者朱衣赤冠命拜堅爲龍驤將

軍健翌日爲壇以授之泣謂堅曰汝祖昔授此
號今汝復爲神明所授可不勉乎及健歿其太
子生嗣位殘虐無度堅遂弑之以昇平元年稱
大秦天王初生夢大魚食蒲又長安謠云東海
大魚化爲龍男便爲王女爲公問在何所洛門
東時堅爲龍驤將軍東海堅封地也其第在洛
門之東生不知是堅以謠言之故誅其侍中魚
遵及其子孫時又謠云百里望空城鬱鬱何青

青瞎兒不知法仰不見天星於是悉壞空城以
禳之

符堅初鳳凰集於東關民歌之曰鳳凰于飛其羽
翼翼淵武聖后饗齡萬億

晉太和間符堅聞慕容恪死陰有圖燕之計卒滅
燕時慕容冲姊僞清河公主年十四有殊色堅
納之寵冠後庭冲年十二亦有龍陽之姿堅又
幸之姊弟專寵宮人莫進長安歌漢紫官諺曰

一雌復一雄雙飛入紫宮時咸懼爲亂又有謠
云鳳凰鳳凰止阿房堅以鳳凰非梧桐不棲非
竹實不食乃植桐竹數十萬株于阿房城以待
之冲小字鳳凰後堅敗冲起兵河東進攻蒲坂
果入止阿房城焉

符堅旣滅燕故長史申胤曰福德在燕秦雖得志
而燕之復建不過一紀黃泓曰其在吳王乎吳
王慕容垂也時時關中謠曰長鞘馬鞭擊左股

太歲南行當避虜秦人呼鮮卑爲白虜後垂起
關東歲在癸未繞一紀云

符堅彊盛之時國有童謠云阿堅阿堅連牽三十
年後若欲敗時當在江湖邊又有謠云河水清
復清符詔死斯城秦人稱其君曰詔堅聞此謠
而深惡之每征伐戒軍候云地有名新城者避
之後敗於淝水竟爲姚萇縊於新城佛寺在僞
位凡三十年

王猛

字景略初隱華山桓溫伐秦入關猛被

還山咨師師曰卿與桓溫豈並世哉在此

可富貴何為乎遠行後符堅因呂婆樓招

猛任以

國事

王猛化洽六州人移風變百姓歌之曰長安大街

夾樹楊槐叶下走朱輪上有鸞栖英彥雲集誨

我人黎

趙整

字文業一名正年十八仕為黃門郎後出家更名道整

秦王堅宴羣臣於釣臺秘書侍郎趙整以堅頗好

酒因爲酒德歌曰。獲黍西秦。採麥東齊。春封夏
發。鼻納心迷。

秦王堅與羣臣飲以極醉。爲限趙整作歌曰。地列
酒泉。天垂酒池。杜康妙識。儀狄先知。紂喪殷邦。
桀傾夏國。由此言之。前危後則。

秦王堅與慕容垂夫人段氏同輦遊於後庭。趙整
歌曰。不見雀來入驚室。但見浮雲蔽白日。堅改
容謝之。命夫人下輦。

符堅分氏戶於諸鎮趙整因侍援琴而歌曰阿得
脂阿得脂博勞舊父是仇綏尾長翼短不能飛
遠徙種人留鮮卑一旦緩急語阿誰堅笑而不
納及敗於姚萇整言始驗

趙整性好幾諫無所迴避符堅末年寵惑鮮卑情
於治政整因歌諫曰昔聞孟津河千里作一曲
此水本自清是誰攪令濁堅動容曰是朕也又
詠棗詩曰北園有一樹布葉垂重陰外雖饒棘

刺內實有赤心堅笑曰將非趙文業耶

梁謹

字伯言

梁謹博學有雋才與弟熙俱以文藻清麗見重一時人爲之語曰關東堂堂二申兩房未若二梁瓌文綺章

王嘉

字子年隴西人清虛服氣不與世人交游石季龍未至長安潛隱終南山符堅

累徵不赴公侯已下咸躬往參詣及姚萇入長安禮嘉如堅故事後因事爲萇所害符登聞嘉死設壇哭之贈太師謚文定公所著有拾遺記

王子年嘗著歌識三章事過皆驗其一云帝諱昌
明運當極特申一期延其息又云諸馬渡江百
年中當值卯金折其鋒至安帝果爲劉氏所代
又有云欲知其姓草肅肅穀中最細低頭熱鱗
身甲體永興福後齊太祖諱道成姓蕭氏穀中
精細者稻也熟猶成也

慕容垂

其先曰東胡爲匈奴所敗分保鮮卑
山曾祖莫護跋魏初率其諸部入居
遼西時燕代多冠步搖冠莫護跋見而好
之乃斂髮襲冠諸部因呼爲步搖其後音

說遂爲慕容焉小字阿六敦長七尺七寸手垂過膝父銳嘗曰此兒好奇終能破人家或能成人家故名霸因墜馬傷前二齒改名缺尋以識文去夾爲垂

慕容垂初封吳王鎮信都威名大振慕容評深忌之謀誅垂時有謠云慕容攀牆看吳軍無邊岸我身分自當枉殺牆外漢慕容愁憤憤燒香作佛會願作牆裏燕高飛出牆外垂懼禍乃奔符堅

慕容垂定都中山立寶爲太子寶嗣位以慕容德

堯山堂外紀卷十八

都督冀充六州諸軍事會魏師入中山寶出奔
薊時有謠云大風蓬勃揚塵埃八井三刀卒起
來四海鼎沸中山頽惟有德人據三臺於是德
之羣臣勸德稱帝

慕容超德兄子也超不恤政事引所親公孫五樓
爲腹心王公内外無不憚之尚書都令史王儼
諂事五樓遷尚書郎出爲濟南太守入爲尚書
左丞時人爲之語曰欲得侯事五樓故大臣北

地王鍾謂段宏曰黃犬之皮恐終補狐裘也五樓聞而恨之後宏奔魏鍾奔秦

慕容熙爲政暴虐其將馮跋張興皆坐事奔亡結盟推高雲爲主初童謡云一束藁兩頭然禿頭小兒來滅燕藁字上有草下有禾兩頭然則禾草俱盡而成高字雲父名拔小字禿頭三子而雲季也熙竟爲高雲所滅

呂光

符堅故將

晉太元間呂光僭卽三河王位徙西海郡人於諸
郡時有謠云朔馬心何悲念舊中心勞燕雀何
徘徊意欲還故巢項之遂相扇動光復徙之於
西河

胡叟

字倫許安定臨涇人以姚氏將衰遂入
長安觀風化後入沮渠不得志乃歸親
賜爵復始男
家于密雲

胡叟入沮渠沮渠牧犍遇之不重叟乃爲詩示所
知廣平程伯達其畧曰羣犬吠新客佞暗排疎

賓直途旣已塞。曲路非所導。望衛惋祝鮪。盼楚
悼靈均。何用宣憂懷。託翰寄輔仁。

堯山堂外紀卷十八終

堯山堂外紀卷十九

晉陵蔣仲舒編

六朝

北魏

道武帝珪

其先漢將李陵後也姓拓跋氏黃帝有子二十五人少子受封北國

黃帝以土德王北族謂土為拓謂后為跋故以為氏

道武帝六世祖聖武帝詰汾嘗出畋歟見輜輶自

天而下既至有一美婦人自稱天女受命相偶

旦日請還期年復會於此言終而別及暮帝至

先田處果見天女以所生男授帝曰此君之子也當世爲帝王卽神元帝力微也時人諺曰詰汾皇帝無婦家力微皇帝無舅家珪暴虐好殺是有神巫誠珪當有累禍唯誅清河殺萬人乃可免珪乃滅清河一郡常手自殺人欲令其數滿萬珪寢處人莫得知唯愛妾名萬人知之妾與珪子清河王私通王因欲殺珪令萬人爲內應珪臨歿曰清河萬人之言乃汝等也

孝文帝宏

獻文帝長子太和二年改姓元氏少善射有膂力年十餘能以指彈

碎羊髀骨至十五便不復殺生雅好讀書善談莊老喜爲文章自太和十年已後詔

冊皆帝
筆也

孝文帝征汴北饗侍臣於縣瓠方丈竹堂中書侍
郎鄭道昭與兄懿等俱侍坐樂作酒酣帝乃作
歌曰白日光天兮無不曜江左一隅兮獨未照
彭城王勰續歌曰願從聖明兮登衡會萬國馳
誠兮混內外鄭懿歌曰雲雷大震兮天門開率
土來賓兮一正曆鄭道昭歌曰舜舞干戚兮天
下歸文德遠被兮莫不思刑鬱歌曰皇風一鼓

兮九地匝戴日依天兮清六合帝又歌曰遵彼汝墳兮昔化貞未若今日兮道風明宋弁歌曰

文王政教兮暉江沼寧如大化兮光四表

鄭道昭字

僖伯嘗為兗州刺史子述祖天保中亦為兗州刺史有人入市盜布其父執之以歸述祖述祖特原之自是境內無盜百姓歌曰大鄭公小鄭公相去五十載風教尚猶同

孝文帝名子恂愉悅憚侍中崔光名子劼勗勉帝

謂光曰我兒名傍皆有心卿兒名傍皆有力答

曰所謂君子勞心小人勞力帝大嗟悅

光本名孝伯嘗

修國史族子鴻撰十六
國春秋時謂一門二史

初文明太后以帝聰聖將謀廢帝乃於寒月單衣
閉室絕食三朝召咸陽王禧將立之賴元丕冲
等固諫乃止帝亦不憾撫念諸弟如初禧窮極
驕奢姬妾數十意尚不已景明中卒以謀逆伏
誅宮人爲之歌曰可憐咸陽王奈何作事悞金
牀玉几不能眠夜蹋霜與露洛水湛湛彌岸長
行人那得渡其歌流傳江表北人在南者雖至

富貴弦歌奏之莫不灑泣

彭城王勰

獻文帝第六子孝文稱其清規懋德松竹爲心

孝文帝宴侍臣于清徽堂日宴移于流化池芳林
下帝仰觀桐葉之茂曰其桐其椅其實離離愷
悌君子莫不令儀今林下諸賢足敷歌詠遂令
黃門侍郎崔光讀暮春羣臣應制詩至彭城王
勰詩帝爲改一字勰曰臣露此拙方見聖朝之
私賴蒙神筆賜刊得有令譽帝曰雖雕琢一字

猶是玉之本體。勰曰：臣聞詩三百一言可蔽，今陛下刊以一字，足以價等連城。

彭城王嘗從孝文帝幸代都，次上黨銅鞮山，路傍有大松樹十數。帝賦詩示勰，曰：吾作詩雖不七步，亦不言遠，汝可作之。比至吾間，令就也。時勰去帝十餘步，且行且作，未至帝所而就。詩曰：問松林松林經幾冬，山川何如昔。風雲與古同。孝文帝嘗宴羣臣酒酣，歡極，帝因舉卮酒屬羣臣。

曰三三橫兩兩縱誰能辨之賜金鍾御史中尉
李彪曰沽酒老嫗甕注甕屠兒割肉與稱同尚
書左丞甄琛曰吳人浮水自云工妓兒擲袖在
虛空彭城王勰曰臣始解此是習字孝文卽以
金鍾賜彪人服彪聰明有智甄琛和之亦速

王肅

字恭懿爲南齊秘書丞太和中奔魏累官尚書令孝文甚重之常呼曰王生

王肅初入魏不食羊肉酪漿嘗飯鯽魚羹渴飲茗
汁京師士子見肅一飯一斗號爲漏卮後與孝

文會食羊肉酪粥。孝文怪問之。對曰：羊是陸產之，最魚是水族之長，所好不同，並各稱珍。羊比齊魯大邦，魚比邾莒小國。惟茗下中，與酪作奴。彭城王勰曰：卿不重齊魯大邦，而愛邾莒小國。明日爲卿設邾莒之殮，亦有酪奴。孝文大笑，因此呼茗爲酪奴。

王肅在江南，娶謝氏女爲妻。及至魏，尚陳留長公主。其後謝氏爲尼來奔，作詩贈肅曰：本爲薄土。

蠶今作機上絲得絡逐勝去頗憶纏綿時公主
代肅答贈曰鍼是貫絲物目中常任絲得帛縫
新去何能納故時肅聞之甚惆悵遂造正覺寺
憇焉

褚綃

褚綃入魏魏欲用之時魏主會綃戲為詩曰帽上
着籠冠袴上着朱衣不知是今是不知非昔非
魏人怒出為始平太守

祖瑩

字元珍少聰書時聖小兒孝文時拜太學博士嘗曰文章須自出機杼成一家

風骨安可共人作生
活也世以爲知言

祖瑩與陳郡袁翻齊名秀出時人爲之語曰京師
楚楚袁與祖洛陽翩翩祖與袁

祖元珍爲彭城王叅軍時尚書令王肅曾於省中
詠悲平城詩云悲平城驅馬入雲中陰山常晦
雪荒松多朔風彭城甚嗟其美欲使肅更詠乃
失語云王公吟詠情性聲律殊佳可更爲誦悲

彭城詩肅戲彭城云何意悲平城爲悲彭城也
彭城有慙色祖在坐卽云有所悲彭城王公自
未見耳肅云可爲誦之元珍應聲云悲彭城楚
歌四面起屍積石梁亭血流睢水裏肅嗟賞之
彭城大悅退謂元珍曰卿定是神口今日若不
得卿幾爲吳子所屈

李謚

趙郡人棄產營書手自刪削每曰大夫
擁書萬卷何假南面百城魏琛令其子

就業
焉

李謚少好學周覽百氏初師事小學博士孔璠數年後璠還就謚請業同門生爲之語曰青成藍藍謝青師何常在明經。

胡武靈后

司徒國珍女也能射中針眼初爲尼頗能講道宣武帝召入掖廷立

后

太后嘗與明帝幸華林園宴羣臣於都亭曲水令王公以下賦七言詩太后詩曰化光造物含氣貞明帝詩曰恭已無爲賴慈英王公已下各賜

帛有差

武都人楊白花少有勇力容貌雄偉靈太后過通
之白花懼及禍乃率其部曲奔梁易名華太后
追思不能已爲作楊白花歌使宮人晝夜連臂
蹋足歌之其辭曰陽春二三月楊柳齊作花春
風一夜入閨闥楊花飄蕩落南家含情出戶脚
無力拾得楊花淚沾臆秋去春來雙燕子願
斷楊花入窠裏

靈太后幸左藏。賜布絹儀同。陳留公李崇。章武王融。並以所負多顛仆於地。崇乃傷腰。融至損脚。時人爲之語曰。陳留章武傷腰折股。貪人敗類。穢我明主。

孫紹歷職內外。垂老始拜太府少卿。謝曰。靈太后曰。公年似太老。紹重拜曰。臣年雖老。臣卿太少。后大笑曰。是將正卿。

臨淮王彧

宅在法雲寺北

或性愛林泉。又重賓客。入其室者咸謂登仙。荊州秀才張裴裳爲五言有清拔之句云。異秋花共色。別樹鳥同聲。或以蛟龍錦賜之。

河間王琛

琛有婢朝雲善吹箎。能爲團扇歌。隴上聲。琛爲秦州刺史。諸羌叛。屢討之不降。琛令朝雲假爲貧嫗。吹箎。諸羌聞之。悉皆流涕。迭相謂曰。何爲棄墳井在山谷爲寇也。相率歸降。秦民語曰。快馬。

健兒不如老嫗吹箎。

蕭綜

字世謙梁武帝第二子封豫章王晉同四年奔魏歷司徒太尉尚書陽公主

蕭綜在魏不得志嘗作悲落葉以申其志云悲落
葉。聯翩下重疊。重疊落且飛。從橫去不歸。長枝
交蔭昔何密。黃鳥關關動相失。夕葉雜凝露。朝
花翻亂日。亂春日。起春風。春風春日此時同。一
霜兩霜猶可當。五晨六旦已颯黃。乍逐驚風舉。
高下任飄颺。悲落葉。落葉何時還。夙昔共根本。

無復一相關。各隨灰土去。高枝難重攀。

洛陽城東建陽里有臺高三丈上作二精舍有鐘
撞之聞五十里太后移在宮內置疑閒室蕭綜
聞鐘聲遂造聽鐘歌三首其辭曰歷歷聽鐘鳴
當知在帝城西樹隱落月東窓見曉星霧露眇
眇未分明烏啼啞啞已流聲驚客思動客情客
思鬱縱橫翩翩孤鴈何所棲依依別鶴半夜啼
今歲行已暮雨雪向淒淒飛蓬旦夕起楊柳尚

翻低氣鬱結。涕滂沱愁思無所托。強作聽鐘歌。

馮元興

字子威元興引爲殿中郎晉泰初爲光祿大夫

馮元興家世寒初因元興之勢託其交道相爲引
用又旣賜歿興亦被廢乃爲浮萍詩以自喻曰
有草生碧池無根綠水上脆弱惡風波危微苦
驚浪

宋世良

孝莊時世良爲清河太守才識閒明尤善政衛郡

東南有曲堤成公一姓阻而居之羣盜多萃於
此人爲之語云寧度東吳會稽不歷成公曲堤
世良施八條之制盜奔他境人又謠云曲堤雖
險賊何益但有宋公自屏跡

溫子昇

字鵬舉嶠之後熙平初舉高第庾信

初至北方時子昇作韓陵山寺碑信
讀而寫其本南人問信北方文士何如信
曰惟寒山寺一片石堪共語餘若驢鳴犬
吠耳張皋亦寫其文傳于江外梁武稱之
曰曹植陸機復生于北土恨我辭人數窮
百六濟陰王云江左人文宋有顏
謝梁有沈任我家子昇足以當之

孝莊時帝舅李延寔除青州刺史將行謂之曰懷
磚之俗世號難治舅宜好用心時黃門侍郎楊
寬在帝側不曉懷磚之義私問舍人溫子昇子
昇曰齊土之民風俗淺薄太守初欲入境百姓
皆懷磚叩頭及其代還以磚擊之言其向背速
於反掌是以京師語曰獄中無繫囚舍內無青
州假令家道惡腸中不懷愁懷磚之義起在於
此

溫子昇擣衣篇云長安城中秋夜長佳人錦石擣
流黃香杵紋砧知近遠傳聲遞響何淒涼七夕
長河爛中秋明月光蠨蟬塞邊絕候鴈鴛鴦樓
上望天狼

邢邵

字子才與溫子昇魏收齊譽世號三才

道暉至北海王昕舍宿飲相與賦詩凡數十首皆在主人奴處旦日奴行諸人求詩不得邵皆爲誦之奴還得本不誤一字魏末除兗州刺史有善政抱鼓不鳴在郡起

清風觀
明月樓

孝靜帝人日登雲龍門崔俊恃宴又勅其子瞻令
近御座亦有應詔詩帝問邢邵曰此詩何如其
父邢曰俊博雅弘麗瞻氣調清新並詩人之冠
燕罷共嗟賞之咸曰今日之讌并爲佳瞻父子
孫拳學淺行薄邢邵嘗謂曰卿更須讀書孫曰我
精騎三千足敵君羸卒數萬拳嘗服棘刺丸李
諧調之曰卿應自足何假外求坐者皆笑邵與婦甚

疎未嘗內宿自云嘗畫八內閣爲狗所吠言畢撫掌大笑

辛德源嘗於邢邵座賦詩其十字曰寒威漸離風
春色方依樹衆咸稱善後王昕逢之適冬春之
交謂曰今日可謂寒威離風春色依樹

袁聿修爲尚書郎十年未嘗受斗酒之遺邢邵每
呼爲清郎及邵爲兗州聿修以太常少卿巡省
邵送白紬爲信聿修不受邵答曰第昔作清郎

今日復作清卿矣

聿修字叔德翻之子
什經入齊齊亡入周

節閔帝恭

孝文帝姪也
初封廣陵王

節閔帝使薛孝通等相嘲以酒爲韻帝倡曰平生
好玄默慚爲萬國首孝通曰旣逢堯舜君願上
萬年壽帝曰卿所謂壽豈得徒然便命酌酒仍
命更嘲孝通以忠爲韻元翻曰聖主臨萬機享
世永無窮孝通曰豈唯被豐草方亦及昆蟲元
翌曰朝賢旣濟濟野苗又充充帝曰君臣體魚
水書執一華戎孝通曰微臣信慶渥何以答華
嵩

初胡太后淫穢日甚鳩殺明帝詔而立臨洮王世子釗爾朱榮入洛將篡位高歡請鑄像卜之鑄不成乃止遂立莊帝子攸而沉胡后及釗於泗水及子攸誅榮爾朱兆入洛與爾朱世隆共立長廣王曄而弑子攸世隆又以曄踈遠廢之而立廣陵王恭高歡入洛以恭神采英毅恐後難制又廢之而立平陽王修恭在位一年旣失位乃賦詩云朱門久可患紫極非情翫顛覆立可

待一年三易換時運。正如此。唯有修真觀。遂遇
弑。

洛陽瑤光寺宣武帝嘗立椒房學道之所掖庭美人並在其中亦有名族處女來儀此寺及爾朱兆入洛縱兵大掠時有秀容胡騎數十入瑤光寺淫穢自後頗獲譏訕京師語曰洛陽男兒急作髻瑤光寺尼奪作壻。

爾朱彥伯節閔帝時封博陵郡王及高歡盡滅爾

朱氏之黨乃執爾朱彥伯與爾朱世隆同斬于
闔闔門外懸首於斛斯椿門樹先是洛中謠云
三月末四月初揚灰簸土覓真珠頭去項脚根
齊驅上樹不須梯至是並驗

武帝脩

孝莊帝孫廣平王之子

脩旣卽位以高歡專恣因密圖之歡覺遂擁兵至
脩懼奔長安依宇文泰時熒惑入南斗去而復
還留止六旬梁武帝以諺云熒惑入南斗天子

下殿走乃跣足下殿以讓之及聞脩西奔慙曰
虜亦應天象邪脩閨門無禮從妹不嫁者三人
平原公主明月從入關泰使人殺之脩不悅由
是與泰有隙飲酒遇鵠而殂初宣武孝明間謠
云狐非狐貉非貉焦黎狗子齧斷索識者以爲
索謂魏本索髮焦黎狗子指宇文泰泰小字黑
獺也

孝靜帝善見

清河王世子高歡追武帝不及
乃立帝于洛陽是爲東魏帝好

文美容儀力能挾石獅子以喻猶射無不
中嘉辰宴會多命羣臣賦詩從容沉雅有

孝文

風

孝靜帝始移都于鄴時有童謠云可憐青雀子飛
來鄴城裏羽翮垂欲化作鸚鵡子又謠云可
憐青雀子飛入鄴城裏作窠猶未成舉頭失鄉
里寄言與婦母好看新婦子按青雀子謂帝實
清河王世子鸚鵡謂齊神武卽高歡也后則神
武之女鄴都宮室未備卽逢禪代作窠未成之

效帝尋崩文宣以后爲太原長公主降於楊愔
時神武婁后尚在故言寄書於婦母新婦子斥
后也

初高歡以逐君之醜待孝靜帝頗盡臣禮高澄嗣
位以崔季舒爲中書黃門察帝動靜澄常侍飲
大舉觴曰臣澄勸陛下帝曰自古無不亡之國
朕亦何用此活澄怒曰朕朕狗脚朕使季舒毆
帝三拳奮衣而出帝不堪憂辱詠謝靈運詩曰

韓亡子房奮秦帝曾連耻。本自江海人志意動。
君子澄乃幽帝於含章堂後遂禪位高洋遇醜
而崩

董紹

字興遠起家四門博士孝武西遷除御史中丞及周文登祚以議論朝廷賜死

董紹爲賀拔岳諮議叅軍岳携紹於高平牧馬紹
悲而賦詩曰走馬山之阿馬渴飲黃河寧謂胡
關下復聞楚客歌

鹿愈

字永吉初爲真定公國中尉天平中除梁州刺史爲反者鄭榮業執送關西

鹿念爲真定公元子直國中尉恒勸以忠廉之節
嘗賦五言詩云嶧山萬丈樹雕鏤作琵琶由此
材高遠弦響藹中華援琴起何調幽蘭與白雪
絲管韻未成莫使弦響絕子直少有令聞念欲
善其終故以諷焉

堯山堂外紀卷十九終

堯山堂外紀卷二十

晉陵蔣仲舒編

六朝 北齊周

齊神武歡

小字賀六渾累世北邊故其俗遂同鮮卑魏永熙初授天柱大將軍

文襄澄歡長子文

宣洋歡第二子也

神武嘗宴群臣酒酣各令歌樂武衛斛律豐樂歌
云朝亦飲酒醉暮亦飲酒醉日日飲酒醉國計
無取次神武曰豐樂不諂是好人也

豐樂名羨
光之弟

神武攻周王壁士卒死者十四五神武恚憤疾發
周王下令曰高歡鼠子親犯王壁劍弩一發元
兇自斃神武聞之勉坐以安士衆悉引諸貴使
斛律金唱敕勒歌曰敕勒川陰山下天似穹廬
蓋四野天蒼々野茫茫風吹草低見牛羊神武
因自和之金世為部落統帥秋朝京師春還部
落號曰勵臣初不解書有人教押名
曰但五星四面平正即得一門之中一皇后二
太子妃三公主然不以為喜嘗謂其子光我家
適以然勞致富
貴何籍女寵

武定中有童謠曰百尺高竿摧折水底然燈澄滅
高者齊姓也五年神武崩摧折之應七年文襄
為盜所害澄滅之徵

文宣未受禪時有童謠曰一束藁兩頭然河邊殺
雞飛上天按藁然兩頭於文為高河邊殺雞為
水邊羊指文宣名也於是徐之才勸帝受禪文
宣鑄像以卜之一寫而成意遂決篡位後又有
謠曰馬子入石室三千六百日文宣以午年生

故曰馬子三臺石季龍舊居故曰石室三千六
百日十年也文宣在位十年果如謠言

高昂

字敖曹幼有壯氣龍唇豹頸姿體雄異其父次同為求嚴師教之昂不遵師訓

專事馳騁每言男兒當橫行天下自取富貴誰能端坐讀書作老博士也其父以其昂藏敖曹故名字之齊神武以為西南道大都督渡河祭河伯曰河伯水中之神高敖曹地上之虎

高敖曹酷好為詩嘗作雜詩三首云塚子地握槊
星宿天圍碁開囊甕張口卷席牀剝皮相送

重相送相送至橋頭培堆兩眼淚難按滿胃愁
桃生毛彈子瓠長棒槌兒牆歌壁亞肚河凍
水生皮時人往々傳以為笑

高敖曹從軍時与相州刺史孫騰作行路難曰卷
甲長驅不可息六日六夜三度食初時言作虎
牢停更被處置河橋北回首絕望便蕭條悲來
雪涕還自抑

高敖曹除侍中司徒其弟季式為濟州刺史敖曹

發驛以勸酒乃贈詩曰憐君停欲歿天上人間
無可比走馬海邊射遊鹿偏坐石上彈鳴雉昔
時方伯願三公今日司徒羨刺史

魏收

字伯起小字佛助神武時修魏史衆口

詭譎然號為穢史收於溫邢稍為後進後
邵被疎出子昇以罪幽歿收遂大被任用
時魏太常劉芳孫女中書郎崔肇師女夫
家坐事並賜收為妾收後病甚殺
二妾及疾瘳追憶之更作懷離賦

魏帝嘗季秋大射普令群臣賦詩魏佛助詩末云
尺書徵建鄴折簡召長安文襄壯之顧謂諸人

曰在朝今有魏收便是國之光彩

收幼習騎射欲以武藝自

達太學博士鄭伯猷調之曰魏郎弄戟多少收

慙悟乃折節讀書年二十七上南狩賦甚見褒
美伯猷謂之曰卿不值老夫猶當逐免

魏伯起在京洛輕薄尤甚人號為驚蛺蝶後文襄

一遊東山令諸臣宴文襄曰魏收恃才卿輩適須

出其短往復數番伯起忽大唱曰楊遵彥理屈

已倒楊從容言曰我綽有餘暇山立不動若遇

當塗恐翩々遂逝當塗者魏翩々者蛺蝶也文

襄先知之大笑稱善

魏伯起挾琴歌曰春風宛轉入曲房兼送小苑百花香白馬金鞍去未返紅妝玉筍下成行

裴伯茂嗜酒踈傲以傷性致殞於家園友人常景李渾王昕盧元明魏季景李騫等十許人於墓旁致酒設祭哀哭涕泣一飲一酬曰裴中書魂而有靈知吾曹也乃各賦詩一篇李騫以魏收亦与之友寄以示收收時在晉陽乃同其作論

叙伯茂云臨風想玄度對酒思公榮時人謂伯

茂性誕傲謂收詩頗得事實伯茂惠耳新構山池與賓客宴集謂

邢子材曰山池始就願乞一名子材曰海中有蓬萊山仙人所居宜名蓬萊蓋蓬音反語裴贇

戲之也故以

劉孔昭畫緝綴一賦以六合為名自謂絕倫曾以

呈魏收而不拜收忿謂曰賦名六合已是太愚

文又愚於六合君四體又甚於文劉不勝忿又

以示邢子才子才曰君此賦正似疥騷馳伏而

無斌媚

收以溫子昇全不作賦邢雖有一兩首又非所長嘗云會須作賦始成大才士

唯以章表碑誌自許此外更同兒戲

魏佛助与邢子才意趣不協更相詆毀魏每議陋

邢文邢云江南任昉文體本疎魏收非直模擬

亦大偷竊魏聞乃曰伊嘗於沈約集中作賊何

意道我偷任語

徐常侍聘齊收錄其文集以示徐令傳之江左徐速濟江而沉

之從者以問徐曰吾為魏公藏拙收每言及沈

休文集毀短之徐之才怒曰卿讀沈文半不能

解何事論其得失因謂收

曰未有与卿談收去避之

鄭元禮崔昂婦弟也。魏收昂之妹夫昂持元禮數
詩示盧思道曰：元禮比來詩詠亦不減。魏收思
道曰：未覺元禮賢於魏收。且知妹夫疎於婦弟。
魏李景收從叔也。有才學名位，在收前。頓丘李庶
謂曰：霸朝便有二魏。收對曰：以從叔見比，便是
耶輸之比。鄉耶輸者，庶癡叔也。時李景與收及
邢子明子才洛
中號兩邢二魏武城崔儼頓丘李若俱
見稱重洛中語曰：京師灼灼崔儼李若
陽休之。父固魏世為北平太守以貪虐為中
尉李平所彈獲罪魏收修國史得休

之助因曰無以謝德當為卿作佳傳乃云
固為北平甚有惠政坐公事免官又云李
平深相
敬重

陽休之好學愛文藻時人為之語曰能賦詩陽休
之時河東裴讓之遷主客郎省中亦有語曰能
賦詩裴讓之

魏武定初陽休之除中書侍郎先是中書專主綸
音魏宣武已來事移門下至是發詔依舊任遇
甚顯時魏收為散騎常侍兼領侍郎与休之參

掌詔命世論以為中興有人士戲嘲休之云有
觸藩之羝羊乘連錢之驄馬從晉陽而向鄴懷
屬書而盈把

盧元明

字幼章南北講和元明与李諧首通

辯收辭藻富逸梁主及其羣臣咸
敬異焉稱曰盧李命世王魏中興

盧元明与潁川王由友善忽夜夢由携酒就之言
別賦詩及明憶其十字云自茲一去後朝市不
復遊元明歎曰由性不狎俗旅寄人間乃今有

夢又復如此必有他故經三日果聞由為亂兵

所害

王昕

字元景楊情重其德素以為人之師表母崔氏生九子皆風流醞籍世號王氏

九龍睇字叔朗昕第三弟也為常山王司

馬澹泊寡慾不以世務為累良辰美景登

臨山水府寮呼

為方外司馬

王元景嘗大醉楊遵彥謂之曰何太低昂元景曰

黍熟頭低麥熟頭昂黍麥俱有所以低昂

王睇嘗共盧思道禊飲賦詩曰日落應歸去魚鳥

見雷連時常山王遣使召晞、不時至明日在丞相西閣思道謂晞曰昨被召已朱顏得不以魚鳥致恠晞笑曰昨晚陶然頗以酒漿被責卿輩亦是雷連之一物豈直魚鳥而已

楊愔

字遵彥文宣每醉輒手殺人以為戲樂愔乃簡鄴下公囚置伏內謂之供御囚

楊愔文宣時尚太原公主文宣大慚愔与侍中燕子獻黃門侍郎鄭子默竝受遺詔輔政時常山王演即昭帝長廣王湛即武帝位地親逼愔等与爾

朱渾天和謀欲裁奪威權由是深相疎忌後竝
為二王所害先是童謠曰白羊頭髦禿殺獼頭
生角又云羊喫野草不喫野草遠我道不遠
打爾腦又云阿廢姑禍也道人姑夫歿也按羊
指情也角文為用刀道人謂廢帝殷小名太原
公主常作尼故曰阿廢姑情子獻天和皆尚帝
姑故曰道人姑夫云

初孝昭之誅楊愔也謂武成云事成以汝為皇太

弟及踐位乃使武成在鄴主兵立子百年為皇太子武成不平欲有異謀先是童謠云中興寺內白鳧翁四方側聽聲雍雍道人聞之夜打鐘時丞相府卽舊中興寺鳧翁謂雄雞蓋指武成小字步落稽也道人謂廢帝殷打鐘言將被擊也後武成用卜者言不舉兵孝昭尋崩武成初封百年為樂陵王既而白虹圍日再重武成欲以百年厭之百年自知不免割帶决畱與其妃斛律氏武成令左右亂捶又令搜之逮堂以行且捶且搜所過血遍地氣息將盡乃斬棄之池中祀祀

瑛哀號不食月餘亦卒
瑛猶在手奉不可開

盧士深

楊遵彥典選時以六十人為一甲楊令其自叙訖
不省文簿便次第呼之嘗誤以盧士深為士琛
士深自辨其名遵彥曰盧郎朗潤所以加玉
盧士深妻崔林義之女有才學春日以桃花鑷兒
面呪曰取紅花取白雪與兒洗面作光悅取白
雪取紅花與兒洗面作妍華取花紅取雪白與

兒洗面作光澤。取雪白。取花紅。與兒洗面作華容。

盧詢祖

范陽涿人。與宗人思道俱為北州人。俊思道字子行。嘗師事邢子才。與魏

收文宣崩。當朝文士各作挽歌十首。擇其善者用之。魏收陽休之祖瑛等。不過得一二首。唯思道獨有八篇。故時人稱為八米。盧郎謂取數多也。關中語。歲以六米七米八米分上。中下云。

盧詢祖甚有口辯。好臧否人物。嘗語人曰。我昨東方未明。過和氏門外。見二陸兩潘。森然與槐柳。

齊列

盧詢祖才辯機敏主客郎李底身短而袍長詢祖腰麓而帶急底曰盧郎腰麓帶難匝答曰大人身短袍易長邢子才嘗戲之曰卿少年才學富盛戴角者無上齒恐君不壽盧答曰詢祖初聞此言實懷恐懼見丈人蒼々在鬢差以自安盧詢祖嘗為築長城子使自負其才內懷鬱々既至役所作築長城賦其畧曰板則紫栢杵則木

瓜何斯材而斯用也。草則離離靡靡。綠岡而殖。但使十步而一芳。余亦何辭間於荆棘。

盧詢祖嘗作趙郡王妃挽歌。其一篇云。君王盛海內。伉儷盡寰中。女儀掩鄭國。嬪容映趙宮。春艷桃花水。秋度桂枝風。遂使叢臺夜。明司滿床空。當時嘆以為佳。

盧詢祖初拜大夏男。有朝士戲之曰。大夏初成。盧卽應聲曰。且得燕雀相賀。

魏佛助盛譽盧思道以詢祖為不及詢祖曰見未能高飛者借其羽毛知逸勢冲天者剪其翅翮邢子廣曰詢祖有規檢襴衡思道無冰稜文舉盧思道小字釋奴從兄昌衡小字龍子宗中俱稱英妙幽州為之語曰盧家千里釋奴龍子。

盧思道聘陳設宴聯句作詩先唱者譏北人云榆生欲飽漢草長正肥驢謂北人食榆吳地無驢故有此句思道卽續之曰共甌分炊飯同鑪各

煮魚謂南人無義同炊異饌也吳人愧之

盧思道聘陳陳主用觀世音語弄思道曰是何商人賁持重寶思道即以觀世音語報曰忽遇惡風漂墮羅刹鬼國陳主大慙

辛德源嘗謂盧思道曰昨作羌姬詩惟得五字云皂陂垂肩并苦無其對思道尋聲曰何不道黃物插腦門

盧思道与庾知禮作詩知禮成而思道未就知禮

曰盧詩何太眷。思道曰自許編蒲疾何如織。
錦遲。

周武帝平齊授思道儀同三司追赴長安與同輩
陽休之等數人作聽鳴蟬篇新野庾信徧覽諸
同作者獨嘆美之其辭曰聽鳴蟬比聽悲魚極。
羣嘶玉樹裏迴噪金門側長風送晚聲清露供
朝食晚風朝露實多宜。爍日高鳴獨見知輕身
蔽數葉哀鳴抱一枝。流亂罷還續酸傷合更離。

整聽別人心。卽斷纔聞客子淚。先垂故鄉已超。
忽空庭正蕪沒。一夕復一朝。坐見涼秌月。河流
帶地從來嶮。峭路干天不可越。紅塵早弊陸生
衣。明鏡空悲潘掾髮。長安城裏帝王洲。鳴鐘列
鼎相求。西望漸臺臨太液。東瞻甲觀距龍樓。說
客恒持小冠出。越使常懷寶劍遊。學仙未成便
尚主。尋源不見已封侯。富貴功名本多豫。繁華
輕薄盡無憂。詎念嫫姚嗟木梗。誰憶田單倦土

土牛。歸去來。青山下。炆菊離。日堪把。獨焚枯。

魚宴林野。終成獨校子雲書。何如還驅少遊馬。

唐明皇自蜀回。登勤政樓歌曰。庭前琪樹已堪攀。塞北征夫竟未還。亦思道。歌詞也。思道後入隋。偶與賓客日中立。內史李德林謂曰。何不就樹蔭。思道曰。熱則熱矣。不能林下立。嘗為周齊興亡論。周則武皇宣帝。悉有惡聲。齊高祖太上咸無善譽。思道嘗謁東宮。東宮謂之曰。周齊興亡論。是卿作。不思道曰。是東宮曰。為卿君者。不亦難乎。思道不能對。

顏之推。字介初。為梁散騎侍郎。後為周軍所破。奔齊。累官黃門侍郎。齊亡。入周。為

御史。上士隋開皇中。太子召為文學。以疾終。

梁元帝時荆州為周軍所破大將軍李穆送之推
往弘農令掌其兄陽平公遠書翰遇河水暴長
具舡將妻子奔齊經砥柱之險時人稱其勇決
在道賦詩曰俠客重艱辛夜出小平津馬色迷
關吏雞鳴起戍人露鮮華劍彩月照寶刀新問
我何去北海就孫賓

蕭慤

字仁祖蘭陵人梁宗室上黃侯曄之子
天保中入齊後主時為齊州錄事參軍

待詔文林

館後入隋

蕭仁祖嘗於炁夜賦詩曰清波收渣日華林鳴籟
初芙蓉露下落楊柳月中疎燕幃絳綺被趙帶
流黃裾相思阻音息結夢感離居邢子才甚愛
之顏黃門亦嘆賞芙蓉楊柳二語謂其蕭散宛
然在目思道獨不愜焉

徐之才字茂卿五葉祖仲融隱秦望山有道
士過之求飲遣一瓢蘆開視乃扁鵲

鏡經一卷遂成良醫之才
初仕梁入齊為散騎常侍

徐之才年八歲時與從兄康造汝南周捨宅聽講

老子捨為設食乃戲之曰徐郎不用心思義而但事食乎之才荅曰蓋聞聖人虛其心而實其腹捨嗟賞之

徐之才聰辯強識有兼人之敏尤好劇談公私會聚各相嘲戲常嘲王昕姓云有言則誑與誰近犬則狂加頸足而為馬施角尾而為羊

徐之才嘗宴客時盧元明在座戲弄之才姓云卿姓徐字乃未入人之才即荅云卿姓盧字在亡

為虐。在丘為虐。生男成虜。配馬成驢。

徐之才與朝士出遊遙望群犬競走諸人令目之
之才厲聲曰為是宋鵲為是韓盧為逐李斯東
走為負帝女南徂

徐之才父雄祖成伯並善醫術世傳其業祖孝徵
戲之呼為師公之才曰既為汝師復為汝公在
三之義頃居其兩之才嘗以劇談調魏收收熟
視之曰面似小家方相之才荅曰若爾便是卿

之葬具

和士開

武成帝疾亟驛追徐之才未至乃以
後事屬士開威權日盛朝士或為之

假子士開傷寒醫云應服黃龍湯士開
有難色有候之者請先嘗之一舉而盡

武平元年童謠云狐截尾你欲除我我除你其年

四月隴東王胡長仁謀遣刺客殺和士開事露

反為士開所譖而歿

武平二年童謠云和士開七月三十日將你向南

臺小兒唱訖一時拍手云殺却至七月二十五

日瑯邪王儼執士開送南臺斬之是歲又有謠
云七月刈禾傷早九月喫饞正好十月洗蕩飯
甕十一月出却趙老至七月士開被誅九月瑯
邪王遇害十一月趙彥深出為西州刺史

熊安生

字植之齊國子博士
劉焯劉炫皆其門人

熊安生博通五經與同郡宗道暉一時人士推為
宗師道暉好着高翅帽大屐州將初臨輒服以
謁見仰頭舉肘拜於屐上自言學士比三公任

城王潛嘗因小忿鞭之道暉徐呼安偉安偉出
謂人曰我受鞭不着體復躡屐而去冀州為之
語曰顯公鍾宋公鼓宗道暉履李洛姬肚謂之
四大

熊安生將通名見徐之才和士開二人相對以之
才諱雄士開諱安乃稱觸々生群公哂之在山
東時或誑之曰某村古塚是晉河南將軍熊光
舊有碑為村人埋匿安生便掘地求之不得連

年訟焉據稱去安生七十三世矣冀州刺史鄭
謹判曰七十三世以今揆之乃是義皇上人且
河南將軍晉無此號安生猶率族人向塚而哭

祖珽

字孝徵瑩之子膏置地牢夜以燕蒿子
為燭眼為所熏喪明時呼盲老公其黨

封孝琰崔季舒
稱為衣冠宰相

祖孝徵所乘老馬自稱驢駒又與寡婦王氏姦通
每人前相聞往復裴讓之與珽早狎嘗於眾中
嘲珽曰卿那如此詭異老馬十歲猶號驢駒姦

逾耳順尚稱娘子。於時喧然傳之。

後主時祖珽勢傾朝野。與陸令萱相結。珽欲立令萱為太后。且曰。陸雖婦人。然實雄傑女媧以來未之有也。令萱亦謂珽為國師。自是朝政日壞。周欲圖齊。然畏斛律光武勇。因密為謠言。令謀傳於齊。云百升飛上天。明月照長安。又云高山崩。擲樹舉盲老公。背上下大斧。饒舌老母不得語。百升斛也。明月光字高山。謂齊盲老公卽珽。

饒舌老母謂令宣會光欲去珽等遂以謠言奏
帝於是誅光周遂滅齊

齊後主緯

民間謂之無愁天子周武帝執以歸殺之夷其族

梁元帝時陸法和隱江陵百里洲妙解神術預見
萌兆再為元帝破賊封江乘縣公元帝敗入齊
文宣以為大都督荊州刺史無病而終法和嘗
書其所居屋壁而塗之及剝落有文云十年天
子為尚可百日天子急如火周年天子迭代坐

時文宣帝享國十年而崩廢帝嗣立僅百餘日
孝昭卽位一年而崩又云一母生三天兩天共
五年。婁太后生三天子自孝昭卽位至武成傳
位後主共五年云

後主雅好傀儡謂之郭公時人戲為郭公歌曰邯
鄲郭公九十九技倆漸盡入滕口大兒緣高岡
雉子東南走不信吾言時當看歲在酉及將敗
果邯鄲高郭聲相近九十九末數也滕口鄆林

也大兒謂周帝太祖子也高岡後主姓也雉鷄
類武成小字後敗於鄧林盡如歌言

武平末有童謠言黃花勢欲落清尊但滿斟時穆
后母子淫辟干預朝政時人患之穆后小字黃
花尋逢齊亡欲落之應

馮淑妃名小憐大穆后從婢也穆后愛衰以五月
五日進之號曰續命慧黠工歌舞後主惑之立
為左皇后周師圍鄴後主以淑妃奔洪洞戍復

奔青州為周武所獲以賜代王達、甚嬖之。淑妃侍達彈琵琶因弦斷作詩曰：雖蒙今日寵，猶憶昔時憐。欲知心斷絕，應看膝上弦。

周明帝毓

初封寧都公

明帝二年秋九月幸同州過故宅賦詩曰：玉燭調秋氣，金輿立舊宮。還當如白水，更似入新豐。霜潭清晚菊，寒井落疎桐。舉杯延故人，今聞歌大風。

章敬遠

夏

志尚簡澹。魏周之際。十徵不屈。明帝深

禮敬之。嘗貽以詩曰。六爻貞遯。世三辰光少微。
潁陽讓逾遠。滄洲去不歸。風動妖蘭佩。香飄蓮
葉衣。坐石窺仙洞。乘槎下釣磯。嶺松千仞直。巖
泉百丈飛。聊登平樂觀。遙想首陽薇。詎能同四
隱。來參余萬幾。敬遠答詩。願不時朝謁。帝勅有
司。日給河東酒一斗。號曰逍遙公。

高琳

字季珉。其先高麗人。仕於燕。後歸魏。賜姓羽真氏。

明帝武成三年討平文州氏師還帝宴群公卿士
仍賦詩言志高琳詩末章云寄言寶車騎為謝
霍將軍何以報天子沙漠靜妖氛帝大悅曰獯
獯陸梁未時款塞卿言有驗國之福也

王褒

初字子淵後避唐諱改字子深漢有
二王褒一字子登其一亦字子淵

王褒高句麗曲云蕭々易水生波燕趙佳人自多
傾盃覆碗漼々垂手奮袖娑娑不惜黃金散盡
惟畏白日蹉跎與陳陸瓊飲酒樂同調時南北

雖限隔其聲調元相通云

庾信

字子山梁散騎常侍侯景亂自建康遁歸江陵居宋玉故宅故其賦曰誅茅宋

王之宅穿徑臨江之府老杜送李功曹歸荆南云曾聞宋玉宅每欲到荊州李義山亦云却將宋玉臨江宅異代仍教庾信居信後為周輕騎將軍開府

庾信肩吾子也梁時肩吾掌管記東海徐摛為左

衛率信及摛子陵並為抄撰學士父子東宮出

入禁闥文並綺艷世稱徐庾及信入周陵入陳

信寄陵詩曰故人倘思我及此平生時莫待山

陽路空聞吹笛悲。

周明帝武帝並好文學庾子山特蒙恩禮趙王招
滕王道周旋款至有若布衣之交信在趙王府
看伎和詩云綠珠歌扇薄飛燕舞衫長琴曲隨
流水簫聲逐鳳皇細縷纏鍾格圓花釘鼓牀懸
知曲不誤無事顧周郎又和云長思統紗石空
想搗衣砧臨叩若有便為說解琴心

蕭韶是梁宗室初為

幼童庾開府愛之有斷袖之歡衣食所資皆開府所給遇有客韶為開府傳酒後為郢州開府

兩上江陵途經江夏韶接開府甚薄坐清油幕
下引開府入宴坐開府別榻有自矜色開府稍
不堪因酒酣乃徑上韶牀踐榻肴饌直視韶面
語曰官今日形容大異近日時賓客滿坐韶大

慙

庾開府春日離合詩曰秦青初變曲未有逐琴心

明年花樹下月月來相尋離合春字田家足閒暇士

友暫流連三春竹葉酒一曲鳴鷄弦離合日字

庾開府示封中錄吃語詩曰貴館居金谷閑局隔

葉街冀君見果顧郊間光景佳又云高階既激

澗廣閣更交柯。葛中久乖角。菊逕簡經過。

王司空

東

餉開府酒。開府以詩答云。今日小園中。

桃花數樹紅。開君一壺酒。細酌對春風。未能扶
畢卓。猶足舞王戎。仙人一捧露。判不及盃中。

堯山堂外紀卷二十

終